



Kalaallit Nunaanni politimesteri nunap ilaani aalajangersimasuni immikkut akuersissuteqartarsinnaannera periarfissaqartillugu nunami maani inunnik angallassissutini biilini assakaasut quaannaveeqqutillit atoqqusaajunnaarnissaat siunertaralugu naalagaaffeqatigiinni oqartussaaffinnut saaffigineqqullugit Naalakkersuisut peqquneqarnissaannik Inatsisartut aalajangiif-figisassaattut siunnersuut.

(Inatsisartunut ilaasortaaq Steen Lyngge, Demokraatit)
(Siullermeerneqarnera)

Steen Lyngge Demokraatinit manna ajornartorsiut ukkataralugu siunnersuuteqarsimammat qujaffigerusuppara.

Silap pissusia avatangiisillu sammissallugit Demokraatinut pingaartuupput. Qularutissaanngilaq uagut innuttaasut silap pissusiata allanngoriartornera avatangiisittalu mingutsinneqarneri piliarigatsigit. Taamaammallu isiginiartariaqarparput qanoq iliorluta silap pissusia avatangiisivullu pitsaanerpaamik atugassaqartissinnaanerlugit.

Siunnersuuteqartup Steen Lyngep sammivaa ukiukkut biilit quaannaveeqqutaannik atuinerput qanoq annertutigisumik silap pissusianut avatangiisitsinnullu sunniuteqartiginersut. Inunnut amerlanernut imaattuaannarsimagunarpoq quaannaveeqqutinik atuisarsimasugut angallannermi uagutsinnut inoqatitsinnullu sillimaniarluta, annerusumik eqqarsaatiginagu silap pissusianut kiisalu avatangiisitsinnut qanoq sunniuteqarnerisut. Taamaattorli erseqqissarusupparput sillimaniarneq pingaartupilussuummat.

Apeqqut pitsassuaq sammisami apeqqutigineqarsinnaasoq unaavoq, qanoq angallannermi sillimaniarneq pingaartissinnaavarput silap pissusianut avatangiisitsinnullu pingaartitsinerput innarlingikkaluarlugu. Siunnersuuteqartup Steen Lyngep tunngavilersuutimini tikkuarpaa Norgemi mississuisimaneq tunngavigalugu quaannaveeqqutinik atuineq inuit inuuneranut naalisaataanerusoq sivitsorsaataanani.

Taannarpiaq aamma peqqutingalugu sammisaq manna pingaaruteqarpoq. Angallannermi isumannaallisaanermut sunniuteqanngitsumik aqqusinernik nungullartitsisarnermik silaannarmillu mingutsitsinermik annikillisisinissamut periarfissanik misissuinissaq anguniarlugu Naalakkersuisut akissuteqaatiminni allannguutissatut siunnersuuteqarsimapput.

Tamassuma misissorneqartariaqarneranut Demokraatit isumaqataapput, taamaakkaluartorli Steen Lyngep siunnersuutaa immikkut akuersissuteqartarsinnaanneq periarfissaatillugu quaannaveeqqutit atoqqusaajunnaarnissaat isumannaatsuusoq isumaqatigaarput.



Taamatut oqaaseqarluta siunnersuut Inatsisinut Ataatsumiititaliamut suliarineqarnissaanut innersuupparput.